

«L'egualitad n'è betg ina chaussa privata»

Avant paucs dis ha il post da stab per l'egualitad da schanzas per dunnas ed umens dal chantun Grischun lantschè il project «equal21» che ha en mira da realisar las medemas cundiziuns da lavur per dunnas ed umens en l'administraziun chantunala.

MARTIN GABRIEL/FMR

L'entschatta da fanadur han las var 3600 collavuraturas e collavuratur da l'administraziun chantunala survegnì posta dal Post chantunal per l'egualitad da las schanzas per dunnas ed umens. En la busta ina retschertga cun dumondas davart il stan actual e la vesta persunala da l'egualitad. La giurista dal Post chantunal, *Susanna Mazzetta* ha ditg a la FMR che l'inventarisaziun da datas vegni accumpagnada dal post spezialisà UND. «Igl è dentant memia baud da discurre da quotas u gia da mesiras.»

Mo 34% èn dunnas

Il maun public haja ina funcziun d'exempel impurtanta per autras patrinas e patrins, ha il schef dal Departament d'educaziun, cultura e protecziun da l'ambient (DECA), *Jon Domenic Parolini* scrit sin la publicaziun dal project «equal21» sin la pagina d'internet dal post chantunal per egualitad che sa chatta en ses departament. «L'egualitad n'è betg ina chaussa privata», ha Parolini ditg. Fatg è ch'il DECA è il sulet departament da l'administraziun chantunala cun dapli dunnas che umens. En ils auters quatter departaments è la quota da dunnas pli bassa. Tut en tut èn 34 perschient da las var 3600 collavuraturas e collavuratur dunnas.

En il meglier cas ina part da la DNA da l'administraziun chantunala

Ils factors impurtants dal project sper la promoziun da las dunnas èn: La promoziun dal cader, la cumpatibilitad da la professiun cun la vita privata, l'egualitad dals salaris, la cultura dal manaschi u il fatg ch'i na dat nagina discriminaziun. En il mument na possia ella betg dir, tge mesiras che sajan necessarias per satisfar a tut quests criteris, ha la giurista dal post chantunal da stab per l'egualitad, *Susanna Mazzetta*, constatà. Quai possia er esser fitg different en las differentas secziuns.

«Quai ch'ins po dentant gia dir è, ch'il tema dependa per gronda part d'ina midada da la cultura da manaschi, perquai che quella sto vegnir sviluppada cuntinuadamain vinvant. En il meglier cas daventa il tema egualitad ina part da la DNA da nossa administraziun.»



Il project «equal21» è ina collavuraziun tranter il Post chantunal per l'egualitad da las schanzas dad um e dunna e l'Uffizi chantunal da persunal.

FOTO MAD

«Il maun public ha ina funcziun d'exempel impurtanta per autras patrinas e patrins»

Cusseglie guvernativ Jon Domenic Parolini

Quatter fasas da project enfin l'onn 2025

Il plan d'acziun per l'egualitad è vegnì acceptà l'onn 2019 dal Cussegl grond ed incumbensà da la regenza l'onn 2020. Il project cuzzà 4 onns e vegn realisà en collavuraziun cun l'Uffizi da persunal. El promova las finamiras dal svilup «Patrun attractiv» e «Promoziun da bunas structures per famiglias» dal program da la regenza 2021–2024. A partir dal mars 2022 fin mez da l'onn 2025 vegnan sviluppadas, realisadas ed evaluadas sin fundament da questas enconuschientschas. En trais ulteriuras fasas ensemen cun tut ils departaments e cun la chanzlia chantunala suondan mesiras per promover l'egualitad en l'administraziun.

Vista da las partiziuns

En il center stettia la cuntentientscha da tut las lavurantas e da tut ils lavurants stat scrit en la publicaziun dal project. I sa mussia che lavurants cuntents midian darar la piazza u manchian main savens a la piazza da lavur pervia da mal-sogna. Cun quai contribueschia il project er a la prevenziun da sanadad e gidia a spargnar custs. Tenor la giurista dal Post da stab per l'egualitad da la schanzas, *Susanna Mazzetta*, saja il questunari ina part, dentant ina impurtanta en l'entir process da la retschertga. Ella spetgia per l'emprima giada ina vista differenziada e tenor partiziuns da l'administraziun chantunala. «E natiralmain spetgain nus cun questa retschertga ina basa per sviluppar ensemen ils proxims pass.»